



REPUBLIKA E KOSOVËS / REPUBLIKA KOSOVA

GJYKATA THEMELORE GJILAN - DEGA E GJYKATËS KAMENICË

---

Numri i lëndës: 2020:118071

Datë: 19.03.2021

Numri i dokumentit: 01615946

P.nr.176/2020

**NË EMËR TË POPULLIT**

Gjykata Themelore në Gjilan - Dega në Kamenicë, gjyqtari Sadri Krasniqi, me sekretaren juridike Tevide Thaqi, në lëndën penale kundër të akuzuarit: L.K.nga , për shkak të veprës penale: Kanosja nga neni 181, paragrafi 1 të KPRK-së, sipas aktakuzës së PTH-së nga Gjilani PP.II.nr.1365/2020, të dt. 16.09.2020, në prani të Prokurorit të Shtetit Shefik Memeti dhe të akuzuarit L.K., shpalli dhe publikisht komunikoi, ndërsa më datën 17.03.2021 përpiloi këtë:

**A K T G J Y K I M**

**I a k u z u a r i :**

**L.K.**, pa pseudonim dhe emër të rrejshëm, nga i ati P., e ëma L., mbiemri i vajzërisë B., i lindur më ....., në ....., , me nr. personal ....., Shqiptar, shtetas i Republikës së Kosovës, i pamartuar, ka të kryer shkollën fillore, i pa punësuar, i gjendjes së keqe ekonomike, në bazë të evidencës që disponon kjo gjykatë nuk ka qenë i dënuar më parë.

**Ë s h t ë f a j t o r**

Sepse,

Më datë 23.08.2020, rreth orës 13:44 minuta, në Kamenicë, në QKMF për shkak të një mosmarrëveshje të momentit me mjekun kujdestar të kësaj Qendre R.B., me veprime dhe fjalë ka kanosur seriozisht të dëmtuarin e lartpërmendur se do ti shkaktojë ndonjë të keqe me qëllim

të frikësimit ose të shkaktimit të ankthit, në atë mënyrë që të njëjtit i drejtohet me fjalët “Keni me pa se kush jam”, dhe më pas del jashtë objektit dhe ofrohet te dritarja e dhomës së kontrolleve ku ishte mjeku, i kërcet në xham dhe ia përsërit të njëjtat fjalë, në këtë mënyrë i pandehuri me dashje me veprimet e veta, te i dëmtuari ka shkaktuar frikë, ankth, pasiguri dhe rrezik permanent për jetë.

- me ç’rast ka kryer veprën penale: Kanosja nga neni 181, paragrafi 1 të KPRK-së

Gjykata në bazë të nenit të lartë cekur dhe neneve 4, 38, 39, 43, 69 dhe 70 të KPRK-së, lidhur me nenin 248, 365 dhe 451 të KPPRK-së, të akuzuarin L. K. e,

## **G J Y K O N**

Me dënim gjobe (në të holla) në shumë prej **300 € (treqindë euro)**, të cilin dënim ka për ta paguar në afatin prej 15 dite nga plotfuqishmëria e aktgjykimit, në të kundërtën, nëse nuk e paguan dënimin me gjobë, i njëjti do ti zëvendësohet me dënim burgu ashtu që për çdo 20 €, do ti llogaritet nga një ditë burg.

Pala e dëmtuar R.B. nga ....., për realizimin e kërkesës pasurore juridike udhëzohet në kontest civil.

Detyrohet i akuzuari L.K., që në emër të paushallit gjyqësor të paguaj shumë prej 20 €, krejt këto në afat prej 15 ditësh nga dita e plotfuqishmërisë së këtij aktgjykimi me kanosje përmbarimi.

## **A r s y e t i m**

Prokuroria Themelore në Gjilan, me aktakuzën PP.II.nr.1365/2020, të dt. 16.09.2020, ka kërkuar që ndaj të akuzuarit: L.K. nga ....., të fillohet dhe shtjellohet procedura penale, për shkak të veprës penale: Kanosja nga neni 181 paragrafi 1 të KPRK-së, të shpallët fajtor dhe të dënohet sipas ligjit.

Gjykata shqyrtoi aktakuzën dhe pas vlerësimit të së njëjtës dhe shkresave tjera të lëndës konstatoi se aktakuza është e bazuar në ligj, andaj duke vepruar sipas të njëjtës, ka caktuar seancë gjyqësore për shqyrtim fillestar kundër të akuzuarit për dat.03.03.2021, në të cilën

seancë gjyqësore pas leximit të aktakuzës nga ana e prokurorit të shtetit, i akuzuari L.K. ka deklaruar se e ka kuptuar aktakuzën dhe veprën penale për të cilën akuzohet, njëherit thekson se e pranon fajësinë për kryerjen e kësaj veprë penale.

Në shqyrtimin fillestar dhe publik, gjykata pas dëgjimit të palëve ka marrë aktvendim me të cilin ka pranuar pranimin e fajësisë, ngase ka konstatuar se janë plotësuar të gjitha kushtet ligjore për një gjë të tillë. Në këtë aspekt, gjykata ka konstatuar se i akuzuari e ka kuptuar natyrën dhe pasojat e pranimin të fajësisë; se pranimi i fajësisë është bërë vullnetarisht nga i akuzuari, se pranimi i fajësisë mbështetet në faktet e çështjes që përmban aktakuza dhe aktakuza nuk përmban asnjë shkelje të qartë ligjore ose gabime faktike.

Andaj, duke u bazuar në të cekurat më lartë, gjykata e ka vërtetuar këtë gjendje faktike:

- se i akuzuari L.K. me dashje ka kryer veprën penale: Kanosja nga neni 181, paragrafi 1 të KPRK-së, në kohën, vendin dhe mënyrën e përshkruar si në dispozitivin e këtij aktgjykimi, për të cilën veprë penale, gjykata të akuzuarin e shpalli fajtor, ngase veprimet e të njëjtit i përmbajnë të gjitha tiparet e kësaj veprë penale dhe se për të njëjtën është edhe penalisht përgjegjës.

Me rastin e vendosjes për llojin dhe lartësinë e dënimit ndaj të akuzuarit për veprën penale të kryer, gjykata vlerësoi të gjitha rrethanat të cilat në kuptim të nenit 70 të KPRK-së, ndikojnë në shqiptimin e drejtë dhe meritore të dënimit ligjor. Në veçanti për këtë rast si rrethana lehtësuese për të akuzuarin gjykata pati parasysh pranimin e fajësisë nga i akuzuari, gjendjen e vështirë ekonomike në të cilën jeton, është penduar thellë për veprën penale të kryer, të dëmtuarit i kërkon falje publike, si dhe premtimin e tij se në të ardhmen nuk do të kryej veprë tjetër penale.

Sipas bindjes së gjykatës, dënimi me gjobë si në dispozitiv të aktgjykimit ndaj të akuzuarit L.K., duke i marrë për bazë rrethanat e përmendura më lartë, është dënim i drejtë, në harmoni me peshën e veprës penale dhe shkallën e përgjegjësisë të akuzuarit.

Gjykata, gjithashtu ka konstatuar se me këtë dënim, mund të arrihet edhe qëllimi i dënimit nga neni 38 i KPRK-së, i cili konsiston në parandalimin e të akuzuarit nga kryerja e veprave penale në të ardhmen dhe të bëjë rehabilitimin e tij; të parandalojë personat e tjerë nga kryerja e veprave penale dhe të shprehë gjykimin shoqëror për veprën penale, ngritjen e moralit dhe forcimin e detyrimit për respektimin e ligjit.

Duke pasur parasysh natyrën e kësaj çështje penale dhe gjendjen financiare të akuzuarit, gjyqtari i vetëm gjykues, bazuar në nenin 451 paragrafi 1 i KPPRK-së, ka vendosur që të akuzuarin ta detyrojë për ta paguar paushallin gjyqësor në shumën prej 20 € (Njëzetë euro), në afat prej 15 ditësh nga dita e plotfuqishmërisë së këtij aktgjykimi me kanosje përmbarimi.

Nga të cekurat më lartë është vendosur si në dispozitiv të këtij aktgjykimi.

**GJYKATA THEMELORE NË GJILAN- DEGA NË KAMENICË,**

P.nr. 176/2020 më datë. 17.03.2021

**Gj y q t a r i,**  
**Sadri Krasniqi,d.v.**

**KËSHILLA JURIDIKE:** Kundër këtij aktgjykimi është e lejuar ankesa në afat prej 15 ditësh nga dita e pranimit të aktgjykimit, Gjykatës së Apelit në Prishtinë, përmë kësaj gjykate.